

## **BERGRIVIER MUNISIPALITEIT VERORDENING INSAKE MEENTGROND**

Kragtens die bepalings van artikel 156 van die Grondwet van die Republiek van Suid-Afrika, 1996, bepaal die Bergrivier Munisipaliteit soos volg:-

Inhoudsopgawe:

1. Definisies
2. Doel en oogmerke
3. Oprigting van weikampe
4. Sluiting van weikampe
5. Goedkeuring om diere te laat wei
6. Beperking van diere tot kampe
7. Getal en toestand van diere
8. Merk van diere
9. Weigelde
10. Besmette diere
11. Karkasse van diere
12. Verbode gedrag
13. Vrystellings
14. Skakelforums binne gemeenskappe
15. Meentbestuursplan en ooreenkomste
16. Waarmerk en dien van kennisgewings en ander dokumente
17. Appél
18. Strafbepalings
19. Teenstrydigheid met ander wetgewing
20. Herroeping van verordening
21. Kort titel en inwerkingtreding

### **1. Definisies**

In hierdie verordening, tensy dit uit die samehang anders blyk, het die volgende woorde die volgende betekenis:

“**groot vee**” beteken beeste en perde en sluit enige ander spesie in wat die Minister in die Provinsiale Koerant as groot vee vir doeleindes van die Wet verklaar;

“**klein vee**” beteken skape en bokke en sluit enige ander spesie in wat die Minister by kennisgewing in die Provinsiale Koerant as kleinvee, vir die doeleindes van die Wet, verklaar;

“**meent**” beteken grond, of ‘n gedeelte daarvan, wat besit word deur, of onder beheer is van die munisipaliteit, en wat deur die munisipaliteit gebruik word, of wat na oorlegpleging met die gemeenskap, vir sodanige ander doeleindes, soos vervat in ‘n meentbestuursplan aangewend kan word;

“**meentbestuursplan**” – ‘n plan, wat met inagneming van die munisipaliteit se Geïntegreerde Ontwikkelingsplan, en na oorlegpleging met die gemeenskap, en met kundige insette waar nodig, opgestel is en riglyne bevat oor die volhoubare benutting van die meentgrond en bewaring van landboukundige potensiaal daarvan ;

“**merk**” beteken enige, geregistreer ingevolge artikel 5(2) van die Wet en aangebring op enige dier vir enige doel, insluitend enige voorstelling van ‘n merk wat beoog word om op diere geplaas te word, soos omstandighede vereis, maar sluit die volgende uit –

- (a) ‘n merk gemaak of geplaas op die horing of hoef;
- (b) ‘n merk van verf op enige dier;
- (c) ‘n klamp, klinknael, etiket aan die oor geheg, of enige merk gemaak op sodange klamp, klinknael of etiket; of
- (d) keep of gat;

“**munisipaliteit**” beteken die Bergrivier Munisipaliteit, gevestig kragtens artikel 12 van die Wet op Plaaslike Regering: Munisipale Strukture, 1998 (Wet 117 van 1998) en sluit enige politieke strukture, politieke ampsdraers, raadslede, behoorlik gemagtigde agent of enige werknemer in wat ingevolge hierdie verordening optree, by wyse van ‘n magtiging wat vestig in die munisipaliteit en gedelegeer of gesubdelegeer is aan sodanige politieke struktuur, -ampsdraer, raadslid, agent of werknemer;

“**voorgeskrif**” beteken voorgeskryf deur die munisipaliteit;

“**wei**” beteken om ‘n dier toe te laat om op die meent te wei; en

“**Wet**” beteken die Wet op Identifisering van Diere, 2002 (Wet 6 van 2002);

## **2. Doel en oogmerke van die verordening**

Die doel van hierdie verordening is om voorsiening te maak vir die benutting en bestuur van meentgrond in belang van die gemeenskap van Bergrivier munisipaliteit en om te verseker dat die landboupotensiaal daarvan volhoubaar benut word en infastruktuur en hulpbronne daarop beskerm word.

## **3. Vestiging van weikampe vir die diere**

- (1) Die munisipaliteit mag ‘n gedeelte van ‘n meent reserveer en omhein en weikampe daarop vestig vir die vee van inwoners.
- (2) Die munisipaliteit mag gedeeltes van ‘n meent afbaken vir weiding van klein- en grootvee.
- (3) Die munisipaliteit mag kampe en omheinde areas oprig vir die vee van inwoners.

## **4. Sluiting van kampe**

- (1) Die munisipaliteit mag, wanneer ook al hy dit nodig ag, vir die doeleindes van, maar nie beperk tot onderhoud of om weiding te laat

hervestig nie, 'n kamp sluit of die beweiding daarvan of gedeelte daarvan op 'n meent, vir bepaalde tydperke van 'n jaar, verbied.

(2) Geen persone mag toelaat dat sy of haar diere in 'n kamp wei wat deur die munisipaliteit gesluit is, ongeag die doel of rede daarvoor.

(3) Die munisipaliteit mag beslag lê op 'n dier wat in 'n kamp wat ingevolge sub- artikel (1) gesluit is, gevind word.

(4) Enige persoon wat sub-artikel (2) oortree, is skuldig aan 'n misdryf.

## **5. Goedkeuring om diere te laat wei**

(1) Geen persoon mag enige dier hou of laat wei in 'n kamp op 'n meent sonder skriftelike toestemming van die munisipaliteit nie.

(2) 'n Persoon wat toestemming wil verkry moet die voorgeskrewe vorm indien by die munisipaliteit wat toestemming mag verleen, na oorweging van die volgende faktore:

(a) die totale getal diere wat alreeds in die kamp toegelaat is; en

(b) die getal en soort diere wat 'n aansoeker in die kamp toegelaat wil hê.

(3) Die goedkeuring wat onder sub-artikel (1) beoog word, mag toegestaan word onderhewig aan die voorwaardes van die weiplek, of die bepaling van 'n goedgekeurde weidings- of meentbestuursplan en enige ander bepaling wat die munisipaliteit nodig ag.

(4) Die reg om te laat wei is persoonlik en geen persoon is geregtig om dit op enige wyse oor te dra of te sedeer nie.

(5) 'n Persoon wat sub-artikel (1) oortree of nalaat om te voldoen aan die voorwaardes wat ingevolge sub-artikel (3) bepaal is, is skuldig aan 'n misdryf.

## **6. Beperking van diere tot kampe**

(1) 'n Persoon wat diere op 'n meent laat wei, moet sy of haar vee beperk tot die kamp wat deur die munisipaliteit aangewys is.

(2) 'n Persoon wat sub-artikel (1) oortree is skuldig aan 'n misdryf.

## **7. Getal en toestand van diere**

(1) Die munisipaliteit mag die getal en soort diere wat deur 'n persoon op die meent gehou word, vasstel.

(2) 'n Persoon wat 'n dier op die meent hou, moet self toesien dat die dier in 'n gesonde toestand is.

(3) Die munisipaliteit mag van 'n persoon wat aansoek doen, of reeds 'n dier op die meent aanhou, vereis om 'n geswore verklaring oor die eienaarskap en toestand van die dier, aan die munisipaliteit voor te lê.

(4) Enige persoon wat –

(a) meer as die vasgestelde aantal diere, ingevolge sub-artikel

(1) bepaal, op die meent aanhou; of

- (b) versuim om 'n dier in 'n gesonde toestand ingevolge sub-artikel (2) te hou; of
- (c) versuim om 'n verklaring te liasseer soos in sub-artikel (3) bepaal; of
- (d) vals inligting aan die munisipaliteit verskaf, is skuldiging aan 'n misdryf.

## **8. Merk van diere**

- (1) 'n Persoon wat enige vee op die meent laat wei moet self toesien dat al sy of haar diere gemerk is ingevolge artikel 7 van die Wet.
- (2) Geen persoon mag enige dier op die meent hou of laat wei alvorens dit gemerk is nie.
- (3) Vee wat op die meent gevind word sonder enige merke, mag deur die munisipaliteit geskut word.

## **9. Weigelde**

- (1) Die munisipaliteit mag weigelde vasstel wat aan hom betaal moet word.
- (2) Indien 'n persoon versuim om weigelde te betaal, mag die munisipaliteit stappe doen kragtens die bepalings vervat in die Verordening insake Kredietbeheer, Tariewe en Skuldinvordering.

## **10. Besmette diere**

- (1) Geen persoon mag enige vee wat besmet is met enige oordraagbare- of aansteeklike siekte, of vermoedelik besmet is met sodanige siektes, op 'n meent bring, laat of laat wei nie.
- (2) Enige vee wat op 'n meent gevind word en wat vermoedelik besmet is met enige aansteeklike of oordraagbare siekte, moet op koste van die eienaar daarvan, ondersoek word deur 'n veearts en indien hy of sy bevind dat sodanige besmetting aansteeklik of oordraagbaar is, mag hy of sy reël dat sodanige vee onder kwarantyn geplaas of vernietig word.
- (3) Enige persoon wat subartikel (1) oortree pleeg 'n misdryf.

## **11. Karkasse van diere**

- (1) Sou 'n dier vrek op die meent moet die eienaar binne 24 uur vanaf die ontdekking van die karkas, reël dat die karkas elders begrawe word, met die verstanding dat indien die eienaar sy of haar plig versuim, die munisipaliteit die karkas sal begrawe en die koste van die eienaar verhaal.
- (2) 'n Persoon wat versuim om 'n karkas soos bedoel in sub-artikel (1), te verwyder en te begrawe, is skuldig aan 'n misdryf.

## **12. Verbode gedrag**

- (1) Geen persoon mag sonder die vooraf verkreeë toestemming van die munisipaliteit –

- (a) enige hut, skuiling, kraal, woning of struktuur van enige soort oprig nie, nog woon, kamp of plak op enige deel van 'n meent;
  - (b) op enige deel van 'n meent enige motorwrakke, ander voertuie, masjiene of enige skroot daarvan, versamel, stort of deponeer nie, of toelaat dat sodanige materiaal daar versamel, gestort of deponeer word nie;
  - (c) op die meent spit of grond, klei, sand, gruis of klip daarvan verwyder nie;
  - (d) op die meent bakstene vervaardig of baksteen-, lym- of houtskool oonde op 'n meent oprig nie;
  - (e) enige plant, bas, bome, hout, brandhout, ruigte, mis of enige gras wat op die meent groei, of is, sny, beskadig, brand, vernietig, versamel of daarvan verwyder nie;
  - (f) met enige heining, hek, waterbak, kraan toerusting of ding inmeng of skade daaraan veroorsaak nie, of enige weiding, bos, boom of struik op 'n meent brandsteek nie;
  - (g) enige pad oor 'n meent gebruik, buiten paaie waarvan die munisipaliteit van tyd tot tyd die gebruik magtig nie, asook paaie wat regtens deur die publiek gebruik mag word nie;
  - (h) enige gif vir watter doel ook al op 'n meent deponeer of op enige wyse daar laat nie;
  - (i) enige wild of voëls van watter beskrywing ook al en wat op die meent voorkom, doodmaak, vang, aanhou, jag of poog om sodanige wild of voëls van watter beskrywing ook al, dood te maak nie;
  - (j) strikke van enige beskrywing op 'n meent stel nie;
  - (k) enige voël of waterhoender se nes vernietig of se eiers of kleintjies daaruit verwyder waar sodanige neste op 'n meent voorkom nie; of
  - (l) in enige dam, rivier of enige water wat op 'n meent voorkom visvang nie.
- (2) Die munisipaliteit mag enige stappe doen of reël dat dit gedoen word, wat nodig is om enige oortreding van sub-artikel (1) te herstel en die munisipaliteit mag enige sodanige koste deur deur hom aangeaan, van die persoon verantwoordelik vir die oortreding, verhaal.
- (3) 'n Persoon wat sub-artikel (1) oortree is skuldig aan 'n misdryf.

### **13. Vrystellings**

- (1) Enige persoon mag by wyse van skriftelike vertoë met vermelding van volle redes, aansoek doen by die munisipaliteit om vrystelling van enige bepaling van hierdie verordening.
- (2) Die munisipaliteit mag-

- (a) skriftelike vrystelling verleen waarin die voorwaardes, indien enige, uiteengesit word asook die tydperk vaarvoor sodanige vrystelling geldig sal wees;
  - (b) enige vrystelling of voorwaarde in 'n vrystelling, wysig of kanselleer;
  - (c) die toestaan van 'n vrystelling weier;
- (3) Die vrystelling tree slegs in werking nadat 'n aansoeker 'n skriftelike onderneming om aan al die voorwaardes van die munisipaliteit in sub-artikel (2) te voldoen, onderteken het. Indien enige aktiwiteit 'n aanvang neem alvorens sodanige onderneming geliasseer is by die munisipaliteit, verval die vrystelling.
- (4) Die vrystelling verval onmiddellik indien enige voorwaarde van die vrystelling nie nagekom word nie.

#### **14. Skakelforums binne die gemeenskap**

- (1) Die munisipaliteit mag een of meer skakelforums binne 'n gemeenskap vestig ten einde –
- (a) 'n platform te skep vir die plaaslike gemeenskap om aan die munisipaliteit se sake deel te neem;
  - (b) 'n plaaslike gemeenskap aan te moedig om aan die sake van 'n munisipaliteit deel te neem; en
  - (c) die bereiking van 'n behoorlik beheerde en administreerde meent, te bevorder.
- (2) Die skakelforum mag die volgende insluit –
- (a) 'n lid of lede van 'n belangegroep, of 'n persoon wat deur die gebruik van die meent geraak word;
  - (b) 'n lid of lede van 'n gemeenskap in wie se onmiddellike gebied 'n meent geskep is;
  - (c) 'n aangewysde beampte of beamptes van die munisipaliteit; en
  - (d) 'n raadslid.
- (3) (a) Die munisipaliteit mag, wanneer ook al dit 'n aansoek vir goedkeuring of vir 'n vrystelling sertifikaat ingevolge hierdie verordening oorweeg, die insette van 'n skakelforum aanvra.
- (b) Die skakelforum of enige persoon of persone in sub-artikel (2) genoem, mag op eie inisiatief insette, vir oorweging deur die munisipaliteit, lewer.

#### **15. Meentbestuursplan en ooreenkomste**

- (1) Die munisipaliteit moet binne een jaar na afkondiging van hierdie verordening 'n meentbestuursplan soos omskryf in artikel 1 aanvaar welke plan jaarliks as deel van die munisipaliteit se Geïntegreerde Ontwikkelingsplan hersien en aangepas kan word.

(2) Die munisipaliteit mag, onderhewig aan die voorskrifte vervat in die Bate Oordrag Regulasies afgekondig ingevolge die Wet op Munisipale Finansiële Bestuur, 2003 (Wet 56 van 2003) 'n skriftelike ooreenkoms met enige party of organisasie sluit rakende die benutting en bestuur van die meent of enige gedeelte daarvan.

#### **16. Waarmerk en diening van kennisgewings en ander dokumente**

(1) 'n Kennisgewing wat kragtens hierdie verordening deur die munisipaliteit bedien is, word geag na behore bedien te wees indien dit deur 'n beampte van die munisipaliteit geteken is.

(2) Enige kennisgewing of ander dokument wat kragtens hierdie verordening op 'n persoon bedien word, word as behoorlik bedien geag –

- (a) indien dit aan die betrokke persoon persoonlik oorhandig is;
- (b) indien dit by die betrokke persoon se woon- of besigheids adres binne die Republiek gelaat word, by 'n persoon wat na raming 16 jaar of ouer is;

(c) indien dit met geregistreerde of gesertifiseerde pos na die laaste bekende woon- of besigheidsadres in die Republiek, van die betrokke persoon gestuur is en 'n bewys daarvan van die posdiens verkry is;

(d) indien die persoon se adres in die Republiek onbekend is, dan wanneer dit op sy agent of verteenwoordiger in die Republiek, op die wyse voorsien onder paragrawe (a), (b) of (c), bedien is;

(e) indien die betrokke persoon se adres en agent of verteenwoordiger in die Republiek onbekend is, dan wanneer dit op 'n opsigtelike plek op die betrokke gronde of sakeperseel, bedien is;

(f) in geval van 'n beslote korporasie, dan wanneer dit by die geregistreerde kantoor van die sakeperseel van die beslote korporasie bedien is;

(g) indien, op versoek van die betrokke persoon, dit aan sy of haar e-pos adres gestuur is.

(3) Bediening van 'n afskrif word geag die bediening van 'n oorspronklike te wees.

(4) Wanneer ook al 'n kennisgewing of ander dokument op die eienaar, huurder/inwoner of houer van enige eiendom of reg in enige eiendom bestel word, is dit voldoende indien sodanige persoon as eienaar, huurder/inwoner of houer van enige eiendom of reg in sodanige eiendom beskryf word en is dit nie nodig om die persoon by name te noem nie.

#### **17. Appél**

Enige persoon wie se regte deur 'n besluit van die munisipaliteit geraak word, mag teen die besluit appelleer met insluiting van die redes vir

sodanige appél, ingevolge artikel 62 van die Wet op Plaaslike Regering: Munisipale Stelsels, Wet 32 van 2000, gerig aan die Munisipale Bestuurder binne 21 dae vanaf datum van kennisgewing van die besluit.

### **18. Strafbepalings**

‘n Persoon wat enige bepaling van hierdie verordening oortree of versuim om daaraan te voldoen, pleeg ‘n misdryf en kan by skuldigbevinding –

- (a) ‘n boete of gevangenisstraf opgelê word, of sodanige boete of gevangenisstraf, of beide sodanige boete en sodanige gevangenisstraf; en
- (b) in die geval van ‘n voortgesette misdryf, ‘n bykomende boete of ‘n bykomende tydperk van gevangenisstraf of sodanige bykomende gevangenisstraf sonder die opsie van ‘n boete of beide sodanige bykomende boete en gevangenisstraf vir elke dag waarop sodanige misdryf voortduur; en
- (c) ‘n verdere bedrag gelyk aan enige koste en uitgawes wat die hof bevind deur die munisipaliteit aangegaan is weens sodanige oortreding of versuim.

### **19. Teenstrydigheid met ander wetgewing**

In die geval van teenstrydigheid tussen enige bepaling van hierdie verordening en Nasionale- en Provinsiale wetgewing, standarde, beleid of riglyne, sal sodanige Nasionale en Provinsiale wetgewing, standarde, beleid of riglyne voorrang geniet.

### **20. Herroeping van verordeninge**

Die bepalinge van enige verordeninge wat voorheen deur die munisipaliteit of deur enige van die munisipaliteite wat nou by hierdie munisipaliteit ingelyf is, afgekondig is, word hierby herroep by soverre dit verband hou met sake wat in hierdie verordening voorsien word en insoverre dit van toepassing gemaak is tot hierdie munisipaliteit deur die volmag vir die uitvoering van magte en funksies kragtens artikel 84(3) van die Wet op Plaaslike Regering: Munisipale Strukture, (Wet 117 van 1998).

### **21. Kort titel en inwerkingtreding**

Hierdie verordening staan bekend as die Verordening insake Meentgrond en werking tree in werking op die datum van publikasie daarvan in die Provinsiale Koerant.